

東華續錄

乾隆六十五

臣王先謙敬編

臣周潤
論著恭校

乾隆三十二年丁亥春正月丁卯諭據期成額等查審已革知州張宏燧營私交結一案究出伊見有虧空及從前李因培赫昇額曾令伊代武陵縣馮其柘彌補虧空銀一萬餘兩等語覽奏深爲駭異李因培前在順天府尹任內曾經獲罪朕不次加恩任用擢至巡撫乃於查辦常德災賑一事玩視民漠諸未妥協是以將伊照部議降調復念其材堪驅策擯棄殊爲可惜旋即用爲四川按察使初不料其在湖南巡撫任內竟敢授意張宏燧代馮其柘彌補虧空至一萬餘兩之多實爲深負朕恩李因培著革職鞫解往湖北交與侍郎期成額等質訊至常鈞辦事本屬平庸特因其

前此曾在軍營出力是以屢用爲巡撫今於侯七郎毆死侯嶽添一案迴護固執庸懦無能毫無主見不堪復勝封疆之任因降旨令其來京然尙欲畀以侍郎或副都統以策後效今觀其面諭張宏燧等於會印稟帖內倒提月日補送是爲欺詐矣又豈表率屬員者所應出此但較之李因培於虧空之屬員顯然授意徇庇欺蒙之罪尙可稍從末減常鈞著革職赫昇額身係滿洲乃受張宏燧投拜門生始終徇庇實屬卑鄙無恥應俟此案審明定擬到日再降諭旨向來各省虧空案件最爲鉅弊雍正年間經 皇考嚴加整頓稍知斂戢每恭繹 硃批諭旨於此事不啻三令五申人亦不敢輕犯意諸弊漸就肅清朕御極以來三十餘載雖未特降旨查辦然亦有犯必懲乃邇年來不肖之員營私執法之案疊次發覺豈若輩因稽察稍疏故習復萌耶朕爲自愧水弱之失與誠

之不能感人若再不能執法則朕亦非甚懦弱姑息之主也至督撫爲國家大吏乃於屬員虧空曲爲徇隱其欺罔實法所不容在伊等平日未嘗不以彌縫隙漏爲得計孰知天理昭彰終歸敗露卽如段成功一案其貪贓發自江蘇而侵虧遂敗於山右此案本爲查究侯七部命案正兇乃於張宏燧供吐見在虧帑情形展轉究詰遂致馮其柘之事水落石出足見天道可畏斷無久而不敗之理外省似此巧爲掩飾之伎倆未經舉發者尙恐不免朕亦不肯令人告訐惟俟其自取卽行按法懲治決不稍爲寬貸也將此通諭中外知之○戊辰諭昨因李因培令張宏燧代馮其柘彌補虧空一案將李因培革職拏問解往湖北質審所降諭旨未將李因培徇庇欺罔之罪敘明恐不知者或疑李因培已將虧空之員參革究擬似無袒護情形何以復治其罪因命取李因培原參本

細閱卽以李因培原參而論其欺隱實蹟已不能掩今爲一一指出不特衆人知其情實罪當雖李因培亦無可置喙如疏內稱馮其柘虧空穀價係署武陵縣任內之事此必因交代時後任不肯接收是以敗露且據該道及該署府揭報後復令張宏燧往查實數則馮其柘虧空至二萬餘兩雖未詳悉指出而爲數之多已隱躍言外及據張宏燧所查謂伊正維藏糧尙無虧缺惟穀價一項實虧銀八千九百餘兩遂以此糾參是顯然使虧帑劣員得以避重就輕且以一參爲解紛之計巧詐欺蒙莫此爲甚而猶得藉口於已列彈章乎至張宏燧所供李因培因甫報並無虧空礙難查辦是以欲其彌縫前授意張宏燧設法彌補銀一萬兩種種營私不法實出情理之外督撫爲疆之表率辦理此等重案敢袒徇欺罔若此而不嚴加懲創何以肅官方而申法紀特再明白宣

示俾中外共知之○以金姓爲禮部左侍郎

由內閣學士遷

○調賀元龍

爲四川按察使以富勒渾爲廣東按察使

山西雁平道遷

○乙亥楊應

琚等奏據總兵朱崙報稱緬匪自楞木潰敗大兵復乘勝追勦二

次共殺賊六千餘人當有伊領兵頭目莽聶眇遮來營懇請罷兵

歸順前呈獻金鐲紅呢花布等物臣以匪曾猛毒狡詐恐陽言納

款陰圖益兵再舉仍飭朱崙加意防勦旋據報該酋加調匪衆不

下二三萬由僻徑越至土司邊界焚掠經我兵迎擊於十二月初

六七等日殺賊千餘人又於十一十二等日斬獲賊首三百二十

餘級時銅壁關大弄種二弄種及止丹各野人均奮勇出力殺賊

千餘人又於十六日朱崙劉德成分路勦殺共斬賊首三百四十

餘級計前後勦殺已幾及萬人我兵惟遊擊馬成龍力戰陣亡查

緬甸原係邊南大國密等崇山阻江爲險水土惡劣瘴癘時行若

欲直搗巢穴恐曠日持久得不償失如猛毒果傾心懷懼願效臣服似即可宥其前愆酌與自新之路得旨另有旨諭軍機大臣等據楊應琚等奏節次勦殺緬匪幾及萬人見在緬甸等懇請罷兵歸順並稱若欲直搗巢穴轉恐曠日持久得不償失似可宥其已往之愆等語所奏似未協機宜該督既奏節次勦殺緬匪多至萬人我兵見在奮勇直前軍威大振緬匪望風懾伏使果係確切情形則實有可乘之會正當厚集兵力因勢深入不難迅奏膚功何以復稱地險瘴多轉欲將就了事正恐該督等止據領兵將弁呈報不無綠營舊習虛張粉飾之弊其前後所報勦殺克捷之處俱未盡可信而緬匪負隅憑險勢難遽與爭鋒果爾亦當將該處實情奏明候朕酌度西師一事運籌決勝一切皆斷自朕衷但從前準夷回部地勢人情皆所洞悉故得隨宜指示督令直前鼓勇

耳今緬匪地隔邊隅勢難遙度而綠旗之兵力又非滿兵可比若該督奏報稍有未實其何以籌畫奏績耶故此事原令該督相機酌辦朕亦並無成見前此屢降諭旨甚明該督既身任其事休戚誼同一體更無庸稍涉虛浮猶之一家之事彼此分理而仰家長爲主持又何所疑慮而不以實告耶前遣侍衛福靈安帶領御醫往視楊應琚病勢計此時將抵永昌福靈安本係侍衛出兵之事職所應爲且前此平定回部時曾隨軍營有年軍務素所諳習若已離永昌則亦可以不必若尚在永昌著就近馳往軍前詳悉體察如見有可乘之勢不過一月半月可以得彼處要害城池福靈安卽不妨同往統兵進剿如該處勢難籌辦伊卽可一面據實詳悉入奏一面回京朕亦得知微外確情以定進止至福靈安此行與該處進兵本屬兩事楊應琚係公忠體國大臣所見素爲正大

諒必不因有此旨稍存觀望推諉也又楊廷璋另摺所奏先示之
威信豫爲陳說之處想楊應琚前此業經辦及如尚未籌畫到此
則楊廷璋到永昌後二人不妨從長面商妥協行之至楊應琚見
在病勢日漸向愈精神亦漸能復舊即可無需助理楊廷璋到後
恐一省兩督調度事宜不能無絲毫同異在該督等均屬重寄彼
此必不稍存意見但恐屬員等不免疑測疑揣或致無所適從於
事轉屬無益況兩廣事務亦屬緊要楊廷璋接到諭旨後可卽仍
回粵東楊應琚於進勦緬匪一事始終經理責成旣專自更易於
集事若楊應琚尙宜調攝數日楊廷璋旣再住數日幫辦亦無不
可再見在進勦之事及楊應琚病體刻屢朕懷此次奏報殊覺遲
滯嗣後如遇打仗得勝緊要事件不拘三日五日俱當隨時加緊
馳奏卽軍營尋常光景及該督就愈情狀亦當十日一奏以紓遠

念發去孔雀翎五支藍翎十支交與該督察看實在出力將弁酌量賞戴用示鼓勵著將此傳諭楊應琚楊廷璋及福靈安知之○辛巳諭期成額定長奏審訊知府李拔所稟買金賄託各情不察虛實輒行稟告請交部嚴加議處並訊出張宏燧代熊學驥買金及張何衢等探信各情由請分別辦理等語李拔原稟止係密送宮兆麟經宮兆麟呈出始行逐一研究並非竟向期成額等捏詞誣控是其所稟雖未盡實轉不必以此加罪其張何衢吳世賢之探聽亦屬外省常有之事均無庸交部熊學驥令屬員買金並短發價銀實屬有罪著革職交部嚴議具奏○諭軍機大臣等期成額等查審馮其柘彌補虧空一案分別擬罪之處已批三法司嚴擬具奏矣此案李因培赫昇額授意屬員以致展轉那移巧爲彌補實出情理之外巡撫爲封疆大臣藩司係錢糧總匯一省之整

飭稽察惟於撫藩是寄乃伊等竟敢上下扶同徇情蒙蔽充其伎倆將何事不可爲是伊等之罪實在於有心欺罔較之監守自盜更爲重大今期成額等以赫昇額依侵盜錢糧一千兩以上律問擬斬候於情罪既不相符而牽引侵盜錢糧律文轉似故爲周內亦不足服赫昇額之心赫昇額不必就此案完結李因培前已降旨拏解湖北質審俟解到後與赫昇額質對明確卽照此旨定擬再行具奏並將讞旨敘入摺內可傳諭期成額定長知之○壬午諭據期成額等查審馮其柘虧空至二萬餘兩之多李因培授意張宏燧代爲彌縫報少及赫昇額令屬員幫同彌補一案飭法營私實出情理之外州縣虧空本有應得之罪若私自通同幫補既使劣員倖逃法網且必復貽累他人效尤侵蝕弊將無所底止深可痛恨上年山西段成功虧帑累疊各屬幫銀填補業經大加懲

創不料未及一年湖南復有此案可見外間上下扶同之習固結不解各省皆然吏治尚可問乎從前州縣侵虧那掩之弊錮習相沿經 皇考御極嚴加整頓始得肅清朕方謂謹守成規即可臻大法小廉之治而刑罰世輕世重張弛互用道亦宜然不意近年藐法欺蒙之案屢懲屢犯此未必非因朕三十年來水弱易玩所致如此則不得不力爲整飭朕亦非不能振綱飭紀者也督撫爲封疆大臣藩司爲錢糧總匯一省之察吏糾貪乃其專責如遇屬員侵虧帑項據實參劾則屬員自必共知顧忌何難使諸弊澈清況督撫等皆朕所簡畀深加倚任之人亦何忍不共勵天良力持公正而乃專事彌縫通同徇隱甘蹈欺罔重罪而不辭是使朕竟無一可信之大臣亦伊等不能承受朕恩享安靜無事之福也試思督撫膺高爵厚祿待之不爲不優而幸際昇平並無折衝宣力

之事宴然坐享豐盈爲稍可自效者不過正己率屬共矢潔清乃
尙不思殫竭丹誠秉公盡職又安用此督撫爲哉見在已經發覺
之案如此則各省之匿而未發者大略相同非朕之必欲逆詐億
不信實伊等甘於自欺致不見信於朕耳此等貪黷欺蒙之輩天
道昭彰無不自然敗露隨時嚴治未嘗不可肅國典而儆官邪然
與其犯而後懲莫若先爲明切申戒特諭各督撫卽就所轄屬
員內通行查察將有無虧空據實保奏計伊等此次覆奏亦未必
遽肯和盤托出卽如前此查覆首邑賠墊一事明知其未可盡信
朕惟將各摺批交該部以待將來證驗此次各省所奏實與不實
朕仍姑不深究奏牘旣陳禍福惟聽其自取將來或別經犯案惟
於覆奏之該督撫是問無謂朕言之不豫也嗣後並著於年終將
屬員有無虧空之處彙奏一次以重責成著爲令並將此通諭中

外知之○諭軍機大臣等期成額等奏審訊馮其祐虧空情節及李因培赫昇額授意張宏燧代爲彌補竟與山西段成功之案事同一類實出意料之外其稱李因培於張宏燧清查梟獍時告伊虧空太多汝係能辦事之人好好去辦我也不用細說等語於緊要處槩付以隱躍含糊全不成話此非當日實在情節難以憑信至赫昇額令各屬員幫同彌補巡撫斷無不知之理其事或係李因培未調任之先或在常鈞接任之後何以並置不問李因培之爲人平日好任機智立崖岸又豈肯隨波逐流與人分過卽以常鈞之遇事顛預亦未必懵懂若此而謂李因培竟甘受屬員愚弄而不顧其誰信之若云因通省倉庫錢糧業經題保無虧恐盡數指參致受奏報不實之咎較伊見在所得罪愆孰輕孰重李因培又豈不知審度決擇何至昧昧然自貽他日之累乎此皆情理所

必無豈足以成信讞試問定長設遇此等虧空之案肯無故曲爲掩蓋致日後發覺因人獲罪乎看來李因培與馮其柘若非別有關切隱情必不肯無端徇情開脫此中關鍵豈可不切實根究將來李因培到案時著逐一嚴行究詰務得確切實情勿少任其狡詞飾混期成額定長如意圖將就完案稍有不實不盡之處朕或另派大臣復往查訊恐伊等不能當此罪也○已丑予原任工部侍郎范璨祭○庚寅諭朕巡幸天津周覽河隄淀閘指示機宜永求畿輔民生利賴翠華臨莅宜沛恩施所有經過地方及天津閘府所屬本年應徵錢糧著加恩蠲免十分之三以昭乘春布澤之意○楊應琚等奏據總兵朱崙等稟報緬甸會猛毒之弟卜坑及領兵頭目莽聶眇遮屢赴軍營乞降據稱前因蠻暮及各土司近年貢獻逾期率衆索取原非抗拒大兵今已屢被懲創情願息兵歸

順至蠻暮新街等處實係夷人資生之路前懇賞給貿易批如此則前此受降之事何以完結且能保我兵既撤彼不誅夷此二處乎又批緬甸亦一大部落彼若乞降當有國王之表同安南暹羅之例或可將就了事然亦必將蠻暮新街獻於中國方可又奏臣等隨飭朱崙傳喚卜坑等詰以猛毒狡詐難信如果畏服當先撤兵輸誠旋據莽叢眇遮等報於十二月二十八日已將匪衆遣散見在委員前往確查得旨另有旨諭此奏大不妥前已有旨此更繼爲嘗試而來非公忠體國與朕同心大臣之所爲大不是矣甯不想病後朕所加恩乎諭軍機大臣等楊應琚等奏緬匪屢次乞降並懇請將蠻暮新街等處賞給貿易見在酌辦一摺所奏大不是已於摺內批示矣前據該督以木邦蠻暮相率歸誠已得緬甸要隘請乘機辦理朕以該督素稱歷練必非輕率喜事者因令其

審勢熟籌以定行止續經該督親往受降自必操成算於胸中豫定善後之計故爾勇往直前並非朕意存成見必令該督如此舉動也昨據該督節次奏報勦殺萬人軍威大振又稱地險瘴多得不償失前後已自相矛盾如果我武旣揚賊匪膽落何難乘勢長驅膚功迅奏而轉爲畏怯不前之語恐所奏非該處實情業經傳諭明切指示今復據奏緬目願遣散兵衆請賞給蠻幕新街照常貿易是緬匪名爲乞降實不過暫退其衆且欲得其故地此等狡詐伎倆其將誰欺而該督遂甘受其愚據以入告可見所奏全非實在情形不過粉飾虛詞藉此以撤兵了局耳試思緬夷亦大部落如實係誠心乞降願附屬國其會自當請罪納款具奏輸誠效安南暹羅之通職貢奉正朔並將蠻幕新街呈獻中國尚可將就了事朕亦無求多於荒服之心卽或事屬難圖亦當將該地見在

情勢據實奏聞候朕酌量定奪今率據綠營將弁捏詞稟報以匪目遣散兵衆爲得意輒欲還其歸附之地息事苟安尙復成何事體豈該督辦理初意卽思如此草率完局獨不計蠻暮新街等處旣已納降並遵定制薙髮卽成內地版圖今若准其貿易則其地仍歸緬匪楊應琚能保此數處人衆不遭緬匪荼毒乎且蠻暮而外尙有木邦整欠整賣等處前此懇求內附時並請我兵保護今該督亦置之不言是緬匪旣得蠻暮則木邦等處亦將悉還之而聽其戕賊乎如此則幾視受降如兒戲何以靖遠夷而尊國體設因緬匪兵衆旣散遽將我兵撤回致有貽誤則伊等之錯謬更不可問矣至於就事完事乃向來督撫等顛倒陋習此施之地方政務尙且不可況邊徼用兵何等重事而亦欲圖聊且塞責耶楊應琚尙屬公忠體國大臣乃竟屢以空言嘗試頗不類其平日所爲